

## **SAN PEDRO MUSUGLLA KARTA KACHASKAMANDA**

<sup>1</sup> Jesucristo kachamuskami nuka kani, Alli Willaita willaspa puringapa. Kamkuna kikinpa alpamanda rispa, kasama chasama purispa, Ponto, Galasia, Kapadosia, Asia i Bitinia suti alpakunapi kaugsanakuskatami kai karta kachaikichita. <sup>2</sup> Kamkunataka, Taita Dios ñugpamandata pai imasa munakuskasinami agllarka. Paipa Ispirituwa paipallami tukugsamurkangichi; chasaka, paita suma uiaspa, Jesucristopa iawarwa maillaska niraingapa. Taita Dios, kamkunata kuiaspa, askurinti suma iuiaiwa kawapuachu.

*Suma luarpi kaugsagringapa iuiailawa kaugsasunchi*

<sup>3</sup> Nukanchipa Iaia Jesucristopa Taita Diusta nisunchi: “Kam, iapa suma atunmi kangi”. Paika, Jesucristo wañuskata kaugsachiskawa, nukanchimanda iapa suma llakirispa, musu kaugsaitami karamurka. Chiwanka, suianakunchimi, suma luarpi kaugsagringapa. <sup>4</sup> Chipika, Taita Dios kamkunata karangapa kaskatami wakachiraiá. Chi wakachiraiaskaka mana tukuringapa kanchu sug tughtu chakirigsina u ima ismugsina.

<sup>5</sup> Kamkuna Cristowa suma iuiarigkunamanda, Taita Diospa iapa iachaiwami kamkunata chariku. Chasaka, tukurii punchakuna chaiaura,

pai imasa niskasinami kamkunata diltudupa kispichingapa ka. <sup>6</sup> Chimandami iukangichi kuntintulla kangakuna, kamkunata achka llakiikuna pasangapa chaiagpipas. Chika, mana unaillami ialinga. <sup>7</sup> Imasami kuri, ninapi rupachiskawa alli kagta iachankuna: chasallatami kamkuna, iapa llakiikuna chaiaskawa Cristowa suma iuiarigkuna kagta kawachirinkangichi. Kuri puchukarinmi. Ikuti Cristowa suma iuiarigkunaka, llakii chaiagpipas, kurimandapas mas balimi niraiangichi. Jesucristo kawarigsamuuraka, paiwa suma iuiarigkunata suma atuniachispa, ningapami ka: “Kamkuna, sumami nukawa iuiarirkangichi”.

<sup>8</sup> Kamkuna, Jesucristota mana kawaspapas, paita kuiangichimi. Manara kawaspapas, paiwa suma iuiarispami kaugsanakungichi. Chasa iuiarispami ñi imawa mana rimai pudiringasina iapa suma alli iuiachiiwa kangichi, kasa iachaspa: <sup>9</sup> paiwa suma iuiarispami kamkunapa almata kispichiska niraiangichi.

<sup>10</sup> Santu Ispirituwa ñugpamanda rimagkunaka, Taita Dios kamkunata suma kuiaspa kispichingapa kagta willaspapas, tapunakuspa tapunakuspami munarkakuna, chi kispichiita ima niraias-kata iachangapa. <sup>11</sup> Cristopa Ispiritumi paikunata ñugpamandata iuiachirka, Cristo kikin iapa llakii nanai pasangapa kagta; nispaka, sug luarpi atun sumaiachigrii tukungapa kagta. Chasa iuiachiruraka, paikuna tapunakurkami Cristo pi kangapa kagta i imaura chasa pasaringapa kagta. <sup>12</sup> Chasa tapunakugtaka, Cristopa Ispiritumi iuiachirka, paikuna kaugsanakuskamandaka mana willana-

kugta. Kamkuna kunaura kaugsanakuskamanda-mi Jesucristomanda chasa willanakurka. Kuna-uraka, chi ñugpamanda willaskakunallatatami suma luarmanda kachamuska Santu Ispirituwa willagkuna, kamkunata ña willanakú. Chi willai-taka, anjilkunapasmi munantrakuna iachangapa.

*Tukuipi alli kangapa, Taita Dios nukanchita agllaskamanda*

<sup>13</sup> Chasamanda, allichirispá, tukuipi alli iuiái-wa kaugsapuanakuichi. Suianakuichi, Jesucristo kawarigsamunkama. Chiurami Taita Dios, suma kuiaspa, kamkunata ima karangapa kaskata chas-kinkangichi. <sup>14</sup> Suma uiag wambrakunasina,

Taita Dios ima niskata uiaspa ruraichi. Paita manara rigsispa, jiru iuiái munaikunawami kar-kangichi; chasa ruraspa mana kaugsanakuichi.

<sup>15</sup> Chasapaka, imasami Taita Dios kamkunata agllag, mana pandarig tukuipi alli ka: kam-kunapas chasallata tukuipi allillapi kaugsapuai-chi, mana pandarispalla. <sup>16</sup> Chasallatami Taita

Dios ñugpamanda librupi willarka, kasa nispa:

Nuka, mana pandarig tukuipi allimi kani.

Chimandami kamkunapas

iukangichi tukuipi alli kanga,

mana pandarispalla.

<sup>17</sup> Kamkuna, Taita Diusta ningichimi: “Taita-mi kapuangi”. Paimi, tukuikunata imasa alli-lla u mana allilla ruraskata kawaspa, imasa chaiaskasina justisiai rurá. Chimanda kam-kuna, kai alpapi ialigkunasinalla iuiarispá kaug-sankama, paita suma kuiaspa manchaiwa ka-puaichi. <sup>18</sup> Kamkunapa ñugpamanda taitakuna,

mana Taita Dioswa iuiarispallami kaugsarkakuna. Paikunasina mana kaugsangapami kamkunata Taita Dios kispichigsamurka. Tukuridiru kulkiwa u kuriwa mana kispichigsamurkachu. Chita allillami iachangichi. <sup>19</sup> Cristo wañuchii tukuspa, paipa iapa suma iawarwami kamkunata kispichigsamurka. Imasami iura ubija ñi imapipas mana mapasina kawariskata runakunamanda wañuchii tukú: chasallatami Cristo ñi imapipas mana mapasina kaskata kamkunamanda wañuchii tukurka. <sup>20</sup> Kai alpa manara tiagpitami Cristota agllaska karka, chasa wañuchii tukungapa. Kai alpa tukuringapa kaillaiakurami kamkunamanda kawarigsamurka. <sup>21</sup> Pai Cristo samuskamandami kamkuna Taita Dioswa suma iuiarigsamurkangichi. Taita Dios kikinmi, Cristo wañuskata kaugsachispa, sumaglla atuniachirka. Chasamandami kamkuna Taita Dioswa suma iuiaripa suianakungichi, paipagma chaiaingapa.

<sup>22</sup> Sutipa Alli Willaita suma uiaspa, kamkunapa almaka maillaskasinami niraiagsamungichi; chasaka, kam kikipura sutipa kuianakuspa kaugsangapakuna. Chimandami iukangichi, tukui suma iuiaiwa parijuma iapa kuianakunga.

<sup>23</sup> Kamkuna mana niraiangichichu wañudur taitakunamanda tiagsamugta. Imaurapas kaugsai iukag mana puchukarig Diospa Rimaimandami musu kaugsaita chaskiska niraiangichi, suma luarma ringapa. <sup>24</sup> Chasallatami ñugpamanda librupi willaraiá, kasa nispa:

Tukui runakuna,  
ugsasinallami kankuna.

Maituku suma kaugsaskakunapas,  
ugsapa tugtusinallami kankuna.  
Ugsa chakiriura,  
tugtukunapas urmankunami.

<sup>25</sup> Ikuti Atun Taita Diospa rimaika  
ñi imaurapas mana puchukaringapa kanchu.  
Chi rimaika, kamkunata Alli Willai willaskatami  
niraiá.

## 2

<sup>1</sup> Chimandami niikichita: tukui mana allilla  
ruraikunata sakiichi. Mana imapipas llullachina-  
kuichi. Mana kawariichi alli runa kagta, mana  
kaspapas. Ñi pitapas mana jiru iuiwai kawai-  
chi. Mana pimandapas wasa rimaichi. <sup>2</sup> Imasa-  
mi uchulla wawakuna, tiagsamuuramanda lichi-  
llata upiangapa munankuna: chasallatami kam-  
kunapas iukangichi, Diospa Rimaillata iachan-  
gapa munangakuna. Chasawaka, suma wiñag-  
sina tukuspami diltudupa kispirinkangichi. <sup>3</sup> Iaia  
Jesús sutipa alli kagta iachagsamuspa paipa  
Rimaita chasa munangapa kangichi.

*Cristo, iapa bali rumi kagsina kaskamanda*

<sup>4</sup> Iaia Jesuspagma alli iuiwai kaillaiaichi. Pai-  
mi ka mana tukuriduru suma kaugsaita karag.  
Imasami wasichinakuskapi mana suma rumita  
wabutinkuna: chasallatami chiuramanda runa-  
kuna, Jesusta wabutirkakuna. Paitaka, Taita Dios  
kikinmi agllarka, Taita Diospa ñawipi iapa bali  
rumi kagsina kangapa.

<sup>5</sup> Kamkunapas, musu kaugsaita iukaspa, suma  
rumikunasinami kangichi. Imasami achka rumi-  
kunawa suglla wasi saiachinkuna: chasallata

sakichiringichi, Santu Ispíritu kamkunata Cristo-wa suglla wasisina rurangapa; chiwanka, Taita Diosmandalla kaugsag sasirdutikuna tukungapa; chasaka kam kikinkuna, ima karai ruragsina paita iukachiringapa. Chasa iukachirigkunataka, Jesucristowami Taita Dios chaskinga. <sup>6</sup> Chasallatami Taita Dios, ñugpamanda librupi willarka, kasa Iaia Jesusmanda nispá:

Imasami, wasichii kallaringapa  
mas atun rumita churangapa chaiá:  
chasallata Sión lumapi  
sug runatami churani.

Paillami kapuá nuka agllaska iapa bali rumisina.  
Paiwa suma iuiarigkunata  
mana chaiangachu,  
ianga suiangapa.

<sup>7</sup> Kamkuna paiwa suma iuiarigkunapa ñawipi, paika iapa bali rumisinami niraiá. Ikuti paiwa mana iuiarigkunaka, paita wabutigsinami rurankuna. Ñugpamanda librupi, kasami paimanda niraiá:

Wasichigkuna wabutiska rumi  
wasita charigmi tukurka.

<sup>8</sup> Paikunamandaka kasapasmi niraiá:

Chi rumipi takarispami urmangakuna.  
Iaia Jesusmanda rimaita iapa mana suma uiagkunami chi rumipi takarigsina niraiá. Paikunamandami Taita Dios chasa tukungapa nirka.

<sup>9</sup> Ikuti kamkunaka, Taita Dios kikin agllaska runakunami kangichi. Iaia mandagpa sasirdutikunami niraiangichi. Taita Diosmandalla kaugsag runakunami kangichi, paipalla kangapakuna;

chasaka, Taita Dios iapa suma alli ruraskakunamanda, kamkuna willaspa kangapakuna. Paimi kamkunata kaiarka, iana tutapisina kaugsanakuskata sakispa, paipa iapa suma punchaiachiska iuiiaiwa kaugsangapakuna. <sup>10</sup> Ñugpataka, kamkuna mana Taita Diospa runakuna karkangichichu. Ikuti kunaauraka, Taita Diospa runakunami niraiangichi. Ñugpataka, kamkunamanda ñi pipas mana llakii iukarkakunachu. Ikuti kunaauraka, Taita Diosmi kamkunamanda llakii iuká.

*Taita Dios ima niskata allilla ruraspalla kaugsasunchi*

<sup>11</sup> Nukapa kuiaskakuna kai alpapi ialigkunasinalla kaugsanakuskatami mañaikichita: kam kikinkunapa jiru iuiai munaikunata mana ruraspalla kaugsaichi. Kamkunapa jiru iuiaikunawa i alli iuiaikunawa makanakugsinami kankuna. <sup>12</sup> Taita Diusta manara rigsikunapa ñawipipas allilla ruraspalla kaugsaichi. Chasa kaugsagpikunaka, paikuna, kamkunamanda “Jiru ruragkunami kankuna” nigpipas, kamkuna allilla ruraskakunatami kawangakuna. Nispaka, justisiai puncha chaiaura, Taita Diusta ningakunami: “Kam, iapa suma atunmi kangi”.

<sup>13</sup> Kai alpapi tukui mandagkuna imasa niskasina rurangichi, Iaia Jesusta kuntintachingapa. Iaia mandag imasa niskasina rurangichi, tukui-kunamanda mas atun niraiagmanda. <sup>14</sup> Chasallata, iaia mandag churaska mandagkuna imasa niskasinapas rurangichi. Maikankuna jiru ruraskakunata justisiangapami churaska kankuna. Ikuti

allilla ruragkunataka: “Sumaglla ruraspami kangichi” ningapami churaska kankuna. <sup>15</sup> Kamkuna allilla ruraspam kangapami Taita Dios muná. Chasa ruraskakunawami Taita Dios muná, upakuna i mana allilla iuiagkunaka kamkunamanda mana imapas juchachinakungapa.

<sup>16</sup> Taita Diospa ñawipi, ñi pipa lutrinsina mana niraiangichichu. “Kachariskasinami kani, nuka imasa munaskasina ruraspam kaugsangapa” iuiarispapas, mana iukangichichu, jiru ruraikunata ruranakunga. Chasapaka, Taita Diospa lutrinsinakuna iuiarispam, tukuipi allilla ruraspam kaugsangichi. <sup>17</sup> Tukuikunawa sumaglla allilla kangichi. Cristowa iuiarig waugkindisina kuianakuspa kaugsangichi. Taita Diusta suma kuiaspam manchangichi. Iaia mandagta suma uiangichi.

*Cristo, nukanchimanda iapa llakii pasaspa, chasallata kaugsangapa iuiachiskamanda*

<sup>18</sup> Lutrinkuna, kamkunapa patrunkunata tukuipi suma manchaiwa uiangichi. Alli patrunkunallata, mana; mana alli patrunkunatapasm iukangichi suma uianga. <sup>19</sup> Maikanpas, ianga asutii tukuspaka, Taita Diosmanda iuiarispam mana piñarispalla pasagpikunaka, paitaka, Taita Diosmi iapa kuianga. <sup>20</sup> Kamkuna jiru ruraskamanda asutiura, mana piñarispalla kagpikunaka, ñi ima primiu mana tiangapa kanchu. Ikuti kamkuna tukuipi allilla ruranakugmanda ianga asutigpika, mana piñarispalla kagpikunaka, Taita Diospa ñawipika allimi ka.

<sup>21</sup> Taita Dios, kamkunata agllarkami, chasa lla-kiikuna pasangapa, mana piñarispalla. Cristo, kamkunamandami iapa llakii pasarka. Chasa pasaspaka, kamkunata kawachirkami, paisina chasallata kaugsangapakuna. <sup>22</sup> Pai Cristo, ñi ima pandariipas mana ruraska karkachu. Ñi pitapas mana llullachiska karkachu. <sup>23</sup> Paita kaminakuura, chasallata mana ainidur karkachu. Paita nanachinakuura, mana randichingapa rimarikurkachu. Chasapaka, kasa iuiaillawami karka: “Tukuipi allilla justisiai rurag Taita Diospa makipimi kani”. <sup>24</sup> Pai kikinpa kuirpupi nukanchipa pandariikunata aparigsinami kruspi klabai tukurka; chasawaka nukanchi, jiru iuiaikunata sakispa, wañuskasina tukuspa, mana imapipas pandaringapa i allilla ruraspa kaugsangapakuna. Paita kruspi klabaspa nanachiskawami kamkuna ambiriska tukugsamurkangichi. <sup>25</sup> Ñugpataka kamkuna, sug ubija chingaska purinakugsinami kaugsanakurkangichi. Ikuti kunaauraka, Cristowami tukugsamurkangichi. Paimi ka ubijakunata suma kawagsina. Kamkunata suma kawagmi ka.

### 3

*Kusandi warmindi imasa kaugsanakui iukaskamanda*

<sup>1</sup> Chasallata, warmikuna, kam kikinkunapa kusata suma uiaspa kaugsangichi. Chasaka, Diospa Rimaita manara uiangapa munag kusapas, paipa warmita allilla ruragta kawas-paka, pudingami chi Rimaita uiagsamungapa, kam mana willagpipas. <sup>2</sup> Kamkuna tukuipi

sumaglla uiaspa ruraspa kagmandami pai pudinga Cristowa tukugsamungapa. <sup>3</sup> Kam warmikuna, “Sumaiasami” iuiarisa, iapa bali katangakuna i kurita ruraskakuna churarispa mana kaugsangichi. Umamanda agchatapas mana iapa sumaiachingichi; chasaka, suma kawaringapa iuiaspalla. <sup>4</sup> Chasapaka, kamkunapa tukui iuiaikunata sumaiachiichi. Chi iuiaita sumaiachigka, tukuiwa sumaglla kaugsaimi iukangapa ka. Chi sumaiachiskaka, ñi imaurapas mana puchukaringapa kanchu. Chasa kagkuna, Diospa ñawipi iapa allimi kankuna. <sup>5</sup> Taita Diosmandalla kaugsag ñugpamanda warmikunapas, chasallata alli iuiaitami sumaiachirirkakuna. Paikunaka, “Taita Dioswami kani” iuiarisa, kikinkunapa kusata sumami uiadur karkakuna. <sup>6</sup> Sara suti Abrahampa warmimi chasa karka. Paipa kusa ima niskata ruraspa, iacharkami paita ninga: “Nukapa iaiami kapuangi”. Kamkunapas, allilla ruraspa, mana iukangichichu ñi ima manchaipas iukangakuna. Chasaka, Sarasinallatatami tukugsamunkangichi.

<sup>7</sup> Kusakunapas, chasallata, kamkunapa warmi-wa iukangichimi, tukuipi sumaglla kaugsangkuna. Iuiariichi, warmikunaka karisina mana wapu kagtakuna. Taita Dios, kamkunata i paikunata suma kuiaspa, iskandikunatami nirka, ditudupa kaugsaita karangapa. Chasamanda, kamkunapa warmita niichi: “Suma kuiaska, allimi kangi”. Chasaka, kamkuna Taita Diusta mañaku-ura, chi mañaikuna mana imapipas arkai tukungachu.

*Alli ruragkuna, llakii pasangapa kaskamanda*

<sup>8</sup> Nigpika chaiakumi, tukuikuna, suglla kag-sina iuiaripa, alli iuiaikunawa sumaglla kaug-sanakungapa. Kuianakuspa, parijuma llakina-kuspa, mana atuniachiripa iuiaiwa kangichi.

<sup>9</sup> Kamkunata ima jiru ruragpipas, mana chasallata randichingichi. Kamkunata kamigpipas, mana chasallata kutichingichi. Chasapaka, maikan jiru ruraspa rimagta: “Taita Dios, kamta iapa kuiaspa kawapuachu” ningichi. Taita Dios, kamkunata iapa kuiaspa kawangapami agllarka. <sup>10</sup> Chasallatami ñugpamanda librupi willaraiá, kasa nispa: Maikanpas unai suma kuntintulla kaugsangapa munag

iukanmi kikinpa kalluwa mana jiru rimanga; chasallata, kikinpa simiwa mana llullanga;

<sup>11</sup> tukui mana allilla ruraikunata sakispa, tukui allillataka ruranga; tukuikunawa sumaglla kaugsangapa iuiarispalla kanga.

<sup>12</sup> Atun Taita Dios, allilla ruraspa kaugsanakuskata sumami kawá. Paikuna mañaskatapas uianmi. Ikuti jiru ruragkunataka, atun Taita Dios mana munanchu.

<sup>13</sup> Kamkuna imaurapas allilla ruraspalla kag-pikunaka, ¿pitak kamkunata mana allilla rurangapa pudingakuna? Ñi pipas manima. <sup>14</sup> Chasa kagpipas, kamkuna allilla ruraspa, llakii pasaspa kagmanda, Taita Diospa iapa kuiaskami kangichi. Kamkunata piñagkuna ima rimagpipas, mana paikunata mancharingichi. <sup>15</sup> Chasapaka, Cristo kamkunapa iaia kagmanda, paita

kamkunapa iuiaiwa ningichi, tukuipi mas alli kagta. Maikanpas kamkunata tapuchukuna, kasa nispa: “¿Piwatak iuiaringichi, chituku kuntintulla suianakungapa?”: chasa tapuuraka, kamkuna suma iuiarispas kangichi, imasa allilla ainingapa. <sup>16</sup> Tukuipi suma ainingichi, mana atunichirispalla. Tukuipi allilla ruraspas kaugsangichi. Chasaka, mana kamkunapa iuiapi ñi ima jiru ruraska kawaringachu. Chasa kawaspaka, kamkuna Cristowa allilla ruraspas purigkunamanda mana suma rimagkuna, kikinkunami pingaipas pasangakuna. <sup>17</sup> Kamkuna jiru rurangataka, allilla ruraskamanda llakichigpikunaka, Taita Dios chasa munagmanda, paipa ñawipi mas allimi niraiankangichi.

<sup>18</sup> Jesucristo kikinmi tukuikunapas pandariikunamanda sug biajilla wañurka. Pai tukuipi allilla rurag, nukanchi mana allilla ruragkunamandami wañurka; chasaka, nukanchita Taita Diospagma pusangapa. Paipa kuirpumi wañurka. Ikuti paipa Ispirituka, kaugsallami ka. <sup>19</sup> Paipa Ispiritullatatami wichkaraiaska almakunata willagrirka.\* <sup>20</sup> Chi almakuna, ñugpamanda taita Noé kai alpapi willakuura, mana paipa uiaska karkakuna. Paikuna mana uiagpikunapas, Taita Dios mana piñaspallami suiakurka, Noé atun barkuta puchukankama. Pusag runakunallami chi barkupi iakupi wañungapa kispirirkakuna.

<sup>21</sup> Chi iaku, bautisadiru iakuta kawachigsina-

---

\* **3:19** Sugkunaka iuiankunami chi wichkaraiaska almakunaka, limbo sutipi Iaias Jesusta suianakuska kagta.

mi karka. Chasamandami kunaura baugtisariskapi nukanchi kispirinchi. Baugtisiariura, mana kanchu kuirputa mapa anchuchingapa. Baugtisariskapi, Taita Diustami mañanchi, nukanchipa iuiyai tukuipi alli tukugsamungapa. Jesucristo kaugsariskamandami Taita Dios nukanchita kispichí. <sup>22</sup> Pai Jesucristo, suma luarma sikaspa, Taita Diospa alli ladumi tiaku. Anjilkuna, tukui sug luarpi mandagkuna i iapa pudigkunapas, pai ima niskatami iukankuna ruranga.

## 4

<sup>1</sup> Chimanda, imasami Cristo, paipa kuirpupi nanaikuna i llakiikuna iukarka: chasallatami kamkunapas iukangichi, nanai i llakii iukanga; chasaka, Cristollawa iuiyai kangapakuna. Mai-kanpas Cristomanda kikinpa kuirpupi nanai i llakii pasagka, mana allilla ruraikunatami sakinga; <sup>2</sup> chasaka, kaugsankama, runakunapa jiru iuiyai-tami sakinga; Taita Dios imasa munakuskasinami ruraspa kaugsanga.

<sup>3</sup> Unaimi kamkuna, Taita Diusta manara rigsispa, jiru munaiwa ruraspa kaugsanakurkangichi. Ñugpataka, imasa munaskasinami tukuipi jiru ruraspa kaugsanakurkangichi. Iapa machaspa, ialigta mikuspa i upiaspami karkangichi. Millangasina ianga diuskunatami kungurispa muchanakurkangichi. <sup>4</sup> Ikuti kunaureka, Taita Diusta rigsigkunawa kamkuna tukugsamuspa, chi jiru ruragkunawaka mana kagmandaka, paikuna, ujnarispa, kamkunamanda kamispami rimanakú. <sup>5</sup> Chasa rimanakugpipas, kaugsakunata i wañuskakunata

justisiangapa puncha ñami chaiamuku. Taita Diustami chiura paikuna willaringapa kankuna. <sup>6</sup> Kasamandami wañuskakunatapas Alli Willaita willai tukurkakuna: paikuna, kai alpapi kuirpupi justisiai tukuspapas, paikunapa ispirituka, Alli Willaita uiaspa, Taita Diospa ñawipi kaugsangapakuna.

*Tukurii punchakuna imasa kaugsangapa chaiagta*

<sup>7</sup> Tukui ima tiaskakuna tukuringapa punchaka, ñami chaiamuku. Chimanda, tukuikunawa alli iuiwai kaspas, Taita Diusta mañanakungichi, mana kungarispalla. <sup>8</sup> Tukuimanda ñugpaka, kam kikinpura allillata kuianakuspa kaugsaichi. Chasa kuiagka, achka mana allilla ruragkunata pasinsiagmi ka. <sup>9</sup> Maikan kam kikinpura wasima chaiagriskatapas kaingangichi, mana ñi imapas rimarispalla. <sup>10</sup> Imasami Taita Dios, sug sugta mingarka, kikinpura suma alli ruranakungapa: chasallatami iukangichi parijuma allilla ruranakunga. <sup>11</sup> Imaura maikantapas rimangapa chaiagpika, Taita Dios iuiachiska rimaikunallata rimangichi. Maikanpas sugkunamanda allita rurangapa chaiagpika, Taita Dios karaska animuwa rurangichi. Tukui ima rurakuskapi, Jesucristomandalla iuiarispas rurangichi; chasaka, Taita Diusta: “Kam, iapa suma atunmi kangi” ningapakuna. Paita nisunchi: “Kam, imaurapas iapa suma atun tukui pudigmi kangi, maituku waranga waranga watakuna ialigpipas. Chasa kachu”.

*Cristowa suma iuiarispas llakii pasaskamanda*

<sup>12</sup> Nukapa kuiaskakuna, kamkuna Cristowa suma iuiarigkuna kaskata kawangapami llakii-kuna nanaikuna chaiamú; mas ima kagpipas, mana ujnaringichi. Chasa pasarigpipas, iuiariichi ñi ima mana pasarigsina. <sup>13</sup> Chasapaka, kamkunapa llakii iukaspas, kuntintulla kangichi, Cristopa llakiiwa sugllapi kamkunapas kagmanda. Chasa iukaspaka, pai askurinti sumaglla kawarigsamuura, chiurami iapa kuntintarin-kangichi. <sup>14</sup> Kamkunata Cristomanda kamigpikunaka, Taita Diospa iapa kuiaskami kangichi. Chika niraianmi Taita Diospa iapa suma Ispíritu, kamkunawa sugllapi kagta. <sup>15</sup> Kamkunapa llakii mana kachu maikanta wañuchigmanda, ñi sisaimanda, ñi jiru ruraimanda ñi sugkuna imasa kaugsanakuskata kawaspa purigmanda. <sup>16</sup> Cristowa kagmanda piñaspa kamispa llakichigpikunaka, mana iuiachi: “Pingaisinami ka”. Chasapaka, chi llakiikunamanda “Pai Siñur” Taita Diusta ningichi.

<sup>17</sup> Taita Dios justisiangapa punchaka ñami chaiarka. Taita Dioswa tukuskakuna maipipas kaskakunatami justisiai kallariku. Nukanchita chasa justisiai kallarigpika, Taita Diosmanda Alli Willaita mana uiagkunaka, ¿imachar pasangakuna?

<sup>18</sup> Allilla ruragkuna,  
maillamandallami  
kispiringakuna.

Taita Diusta mana manhaspa pandarigkunaka,  
¿imasik pasangakuna?

<sup>19</sup> Chasamanda, Taita Dios imasa lisinsiaskasina paikunata piñaspa kamispa llakichii tukugkunaka

iukankunami, alli ruraita mana sakispalla apanakunga i Taita Dios nukanchita wiñachigpa makipi almatapas mingangakuna. Pai ima niska mana llullanchu.

## 5

### *Cristowa tukuskakunata iuiachiskamanda*

<sup>1</sup> Kunaauraka, kamkunapura iacha taitakunata iuiachingapami munani. Nukapas, kamkunasina iacha taitami kani. Cristo imasa nanaiwa llakiiwa kagta kawaskata willagmi kani. Paipa suma atun puncha kawarigsamuura, nukapas kamkunawa sugllapimi kawarigringapa kanchi.

<sup>2</sup> Kasami niikichita: Taita Dios kamkunata mingaska ubijakunasinata suma kawapuaichi. Taita Dios imasa munakuskasina alli iuiaiwami iukangichi paikunata suma kawanga. Mana kawapuaichi, maikan “Kasa rurai” nigmandalla ñi “Kulki-mi kuawanga” iuiarispalla. Mana killaspalla tukuipi kawapuaichi.

<sup>3</sup> Kamkunata mingaskakunata mana iukangichichu, imasa munaskasina paikunata ruranga. Iukangichimi, paikuna imasa suma kaugsaita kawaspa iachaikungasina suma kaugsangakuna. <sup>4</sup> Chasa kaugsagkunaka, ubijakunasinata iaia kawag Cristo kawarigsamuura, mana imaurapas wagllirig llaugtusinata chaskispa, sumaiachiimi tukungapa kangichi.

<sup>5</sup> Chasallata, musukuna, iacha taitakunata suma uiaichi. Tukuikuna iukangichimi, kam kikinapura mana atuniachirispalla, ima iachachinakuskata suma uiangakuna. Chasallatami ñugpamanda librupi willaraiá, kasa nispá:

Maikan atuniachiriska iuiaiwa kagkunata,  
Taita Diosmi paikunata wabutí.  
Ikuti mana atuniachirispalla iuiaiwa kagkuna-  
taka

alli iuiaikunatami kará;  
chasaka, paikuna sumaglla kaugsangapa.

<sup>6</sup> Chasa kagmandaka, tukui pudig Taita Diospa ñawipi, “Uchullasinami kani” iuiariichi; chasaka, pai niska puncha chaiamuuraka, suma atuniachiska kangapa. <sup>7</sup> Taita Dioska, kamkunata suma kawagmi ka. Chimanda, tukui llakiikunata iuiaikunata paipa makipi churaichi.

<sup>8</sup> Imasami liun, pitapas mikungapa maskaspa, sinchi wakaspa purí: chasallatami kamkunata piñag iaia kukuka, pitapas puchukangapa maskaspa puriku. Chimanda, alli iuiaiwa rigcharaiagsina kapuaichi. <sup>9</sup> Jesucristowa suma iuiaripa, chi iaia kukumanda michariichi. Iachangichimi, tukui alpakunapi kamkunapa waugki i panikunapas chasallata llakinakugta.

<sup>10</sup> Kamkuna chi llakiikunata sug ratulla pasaskauramandaka, iapa suma kuiag Taita Dios kikinmi, kamkunata tukui allipi ruraspa, tukuipi allilla charingapa ka, mana paipagmanda llugsichii tukungapa. Paimi nukanchita agllarka, Jesucristowa paipa suma puncha luarpi diltudupa kaugsagringapa. <sup>11</sup> Paita nisunchi: “Kam, imaurapas tukui pudigmi kangí, maituku waranga waranga watakuna ialigpipas. Chasa kachu”.

*Kaiakama, niskamanda*

<sup>12</sup> Waugki Silvanowami kai uchulla kartata iskribirkaikichita. Paika, Cristowa suma iuiarig

waugkimi kapuá. Kamkunata suma iuiachinga-pami nirkaikichita, Taita Dios sutipa kamkunata suma kuiagta willangapa. Chi kuiaimanda mana kungaringichi.

<sup>13</sup> Cristowa tukuskakuna Babilonia niraiaskapi kaskakuna, kamkunasina Taita Dios agllaska kagkunami, “Puangi” ninakú. Nukapa wambrasina Marcospasmi, “Puangi” kamkunata niku. <sup>14</sup> Kam kikipura Taita Diospa kuiaiwa iuiarispa muchanakupsa, “Puangi” ninakuichi. Cristowa tukui tukuskakuna, sumaglla kaugsapuaichi.

## **Kaipimi Taita Dius Rimaku New Testament in Inga**

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

